

Guangjisi Minzcu Bau

ganhhau: CN45-0036 B.2019 Nd.2 Ng.13 liggaueq geijhah nienz ndwencieng cogouj

广西民族报

(壮文版)

主办:广西区民语委

出版:广西民族报社

出版周期:逢星期三出版

出版期数:总第3361期

Cingsih Banh Ciet Lijyouz Vwnzva Minzsuz Ciengmoq Bi 2019 Nem Gij Hozdung Ndwencieng

Vih caenh' itbouh fungfouq ndwen-ngoenz vwnzva vunlai caeuq gij huq lijyouz, hawj ndwenngoenz vwnzva ngoenzciet hoenghwd, hawj lwgminz roxnyinh ndaej, roxnyinh vuenyungz, caux ok gij heiqfaenh ngoenzciet vwnzmingz huzndei, vunlai caez angq, angqyangz nauhyied, Cingsih Si daj bi 2019 ndwen 1 ngoenz 19 haindu, daengz ndwen 2 ngoenz 18, cujciz haiguh ciet lijyouz vwnzva minzsuz ciengmoq bi 2019 nem gij hozdung ndwencieng, hozdung guh ndwen ndeu.

Baez hozdung neix gig lai, baugvat:

Aen gaihmusiz ciet lijyouz vwnzva minzsuz ciengmoq bi 2019 Cungguk • Cingsih, Cingsih Si comzyienj heiq lajmbanj, gij hozdung cunzyouz vwnzva minzsuz Bouxcuengh Cingsih Si, gij hozdung baenzroix diyyuz ndwencieng, gij hozdung vwnzva minzsuz ciengmoq ginggih, gij hozdung baenzroix "vwnzva leih minz hom saw Cingsih" daengj.

Aen si neix dingmaenh gij fueng-cim "vwnzva dap daiz, lijyouz coisiu, vunlai caeuqfaenh", ciuq gij yencwz angqyangz, doxhuz, ancienz, mbaet-yungh, doed ok gij cawjdaez "baij fung-

cingz henzguk, yienj minzsuz daeg-bied", gvangqlangh haiguh gij vwnzdij hozdung fungfouq lai yiengh, cangqheiq doxhwnj, vunlai haengj dingq gyaey yawj caeuq bouxhek gyaeymaij, haenhndei haenx, rengzrdw dawz Cingsih lijyouz caeuq gij hozdung baenzroix vwnzva ndwencieng dox giethab hwnjdaej, vih cauh gij binjbaiz hawsingz "byadah singz henzguk • Cingsih gyaunde", doidoengh doiq rog doxgyau doxgap, coicaenh ginghci ndawbiengz hwnghat cuknet giekdaej.

(Yangz Liujcingh)

SIUSIK DINJ

● Ndwen 2 ngoenz 8, Dasinh Yen banh "aen loqsiengj Cungguk raeuz" vwnzva haeuj fanh ranz hozdung, neiyungz lai dangqmaz, miz guh ceiz, diuq fouxsaux, dwk-gyangq, diuqcag, eu fwen daengj cezmu, hawj vunlai youq dieg daejniemh minzsuz vwnzva, roxnyinh seizcin gyaunde.

(Vangz Veijlinz)

● Mboengq ndwen-cieng, doih cuengq denyingj gyaey minz maenh bien Ningzmingz Yen Swlang Yangh dingjmaenh bae mbanj henzguk haiguh "ciengmoq haeuj gihcwngz • denyingj haeuj fanh ranz" hozdung, fungfouq gij ndwenngoenz vwnzva vunlai henzguk, hawj vunlai henzguk yawjngonz denyingj gvaq mbat ndwencieng angqyangz ndeu.

(Cauh Yizgangh)

● Ndwen 2 ngoenz 5, liggaueq ndwencieng coit, Bingzsiengz Sangsiz Cin gak cunh(segih) gag cujciz banh foux saeceij, eu fwen, diuq fouxvangcangz, doxdax bengcag, doxdax dwk lanzgiuz daengj vwnzdij hozdung lai cungj lai yiengh. Ciuq cam rox, Sangsiz Cin gaenq laebdaeb lai bi banh doenghij hozdung coux ciengmoq neix, caux ok gij heiqfaenh ciengmoq angqyangz nauhyied.

(Nungz Veijginh)

● Mboengqneix, Denzyangz Yen Denz-couh Cin Nazdangz Cunh Mbanjgyang Dangcaz banh aen vanjvei yienjheiq coux ciengmoq bi 2019, caemhcaiq cingj haujlai doih yienjheiq honghoengq mbanj henzgyawj caemh daiz yienjheiq, yienj daiz heiq ndeyawj ndeu hawj vunlai daengx mbanj yawj.

(Vangz Gozsun)

Lungzswng: Minzsuz Lai Yiengh Hoh Ciengmoq

Ndwen 2 ngoenz 10 dwg liggaueq ndwencieng coloeg, Lungzswng Gak Cuz Swciyen Bingzdwngj Cin Gvangjnanz Cunh banh hozdung ciet vwnzva laeuzgyong. Beixnuengx Dungcu dangdieg ndang daenj buhvaq moqsag doxcomz giz ndeu, haiguh minzsuz cunzyouz, foux lungzfiengz saeceijfiengz, aenvenz caijdangz caeuq gwn ngaizhumx daengj daegsaek minzsuz vwnzva hozdung, yinx ndaej haujlai bouxhek caeuq vunlai daej ciengqgo diuqfoux angqhoh ciengmoq. Ndaw doz dwg beixnuengx Dungcu cingq foux lungzfiengz.

(Banh Cisiengz/潘志祥)

Duh' anh: Haenqrengz Doicaenh Hwnjguh Vwnzva Lajmbanj Daezswng Gij Cingsaenz Vwnzva Saedcej Vunlai Mbanjyauz

Bi 2018, Duh' anh Yauzcuz Swciyen mboujduenh gyalai gij ligdoh hwnjguh gij gunghcwngz vwnzva bangfuz vwnzva leih minz, hawj vwnzva lajmbanj bang doi cinjcing vut gungz, hawj gij aeuyungh cingsaenz saedcej ngoenz lai gvaq ngoenz vunlai lajmbanj habhoz.

Cuknek hwnjguh giekdaej sezsih, gung aendieg hawj vunlai guh vwnzva hozdung. Seizneix, daengx yienh 19 aen yanghcin cungj hwnjguh miz aen fuengzcamh doglaeb 400 bingzfanghmij doxhwnj, boiq miz bouxguenleix vwnzva, gya cawx dennauj, sezsienggih, aen' ingjsiengq, mbanj doih yienjheiq honghoengq boiq miz yinhyangj, daeng daengj sezsih; miz 10 aen ranz vwnzva hozdung gaep mbanj 100 bingzfanghmij doxhwnj; hwnq miz 40 aen dieg

lienhdang diyyuz gaep mbanj, hawj vunlai miz dieg guh vwnzdij hozdung.

Gyagiengz hwnjguh aendoih vwnzva, daezsang gij rengzhoengh vwnzva hozdung vunlai lajmbanj. Aen yienh neix gaenxmaenx laebbaenz aendoih yienjheiq lajmbanj, daengz seizneix daengx yienh miz 300 lai aen, 4000 lai vunz. Vih daezswng gij suijbingz vwnzva hozdung lajmbanj, bi 2018 aen yienh neix banh le aen ban diuqfoux, aen ban ciengqgo, aen ban son' gyaug fwen daengj lai loh son' gyaug vwnzyi yezvu daengz 500 lai vunzbaez.

Gaenxmaenx haiguh vwnzva hozdung roengz mbanj, hawj gij heiqfaenh vwnzva lajmbanj hoenghwd. Bi 2018 aen yienh neix cujciz Lahlez Cin daengj 5 aen doih yienjheiq honghoengq, yungh

gak minzcuz doxndei doxbang huzndei hwnghat guh neiyungz, gag bien gag yienj cezmu, haiguh roengz mbanj cunzdauq yienjok 100 lai ciengzbaez, fungfouq le gij cingsaenz saedcej vunlai gak cuz.

Ca ndei "sam gvanj camh ndeu ranz ndeu" haicuengq mbouj aeu cien, bang doi haiguh vwnzva bangfuz leih lwgminz. Aen yienh neix dawz yienh duzsuhgvanj, vwnzva' gvanj, bozvuzgvanj, camh vwnzva cunghab yanghcin, ranzsa nungzyah daengj dieg goenggungh vwnzva haicuengq mbouj aeu cien. Bi 2018, aen yienh neix hoizguh benqoghgyau denyingj Vahcuengh 45 bouh bae lajmbanj cunzdauq cuengqingj 300 lai ciengzbaez, bouxyawj daengz 8 fanh lai vunzbaez.

(Lanz Fuzgvanh)